

Na osnovu člana 16. stav 4. Zakona o Vladi Zeničko-dobojskog kantona – Prečišćeni tekst (“Službene novine Zeničko-dobojskog kantona”, broj 7/10 i 3/23) i člana 19. stav (6) Zakona o razvojnem planiranju i upravljanju razvojem u Federaciji Bosne i Hercegovine (Službene novine Federacije BiH“, broj: 32/17), a na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona, na 120. sjednici, održanoj 06.03.2026. godine, d o n o s i

ZAKLJUČAK

I.

Utvrđuje se Prijedlog Odluke o usvajanju Strategije za unapređenje prava i položaja osoba s invaliditetom u Federaciji Bosne i Hercegovine 2025.-2030. godina kao sektorskog strateškog okvira Zeničko-dobojskog kantona.

II.

Zaključak sa Prijedlogom Odluke iz tačke I. ovog zaključka upućuje se u dalju skupštinsku proceduru.

III.

Zaključak stupa na snagu danom donošenja.

Broj: 02-_____/26

Datum, 06.03.2026. godine

Zenica

PREMIJER

Nezir Pivić

DOSTAVLJENO:

1x Ministarstvo za rad, socijalnu politiku i izbjeglice,

1x Stručna služba Skupštine,

1x a/a.

PRIJEDLOG

Na osnovu člana 37. stav (1) tačka f) Ustava Zeničko-dobojskog kantona, a u vezi sa članom 19. stav (6) Zakona o razvojnom planiranju i upravljanju razvojem u Federaciji Bosne i Hercegovine („Službene novine Federacije BiH“, broj: 32/17), Skupština Zeničko-dobojskog kantona na __. sjednici održanoj dana __. __. 2026. godine, d o n o s i

O D L U K U

o usvajanju Strategije za unapređenje prava i položaja osoba s invaliditetom u Federaciji Bosne i Hercegovine 2025.-2030. godina kao sektorskog strateškog okvira Zeničko-dobojskog kantona

Član 1. (Predmet)

Ovom Odlukom usvaja se Strategija za unapređenje prava i položaja osoba s invaliditetom u Federaciji Bosne i Hercegovine 2025.-2030. godina kao sektorski strateški okvir Zeničko-dobojskog kantona (u daljem tekstu: Strategija).

Član 2. (Implementacija)

(1) Strategija predstavlja osnov za izradu implementacionih dokumenata kantonalnih organa uprave (u daljem tekstu: implementacioni dokumenti), u skladu sa članom 19. stav (7) Zakona o razvojnom planiranju i upravljanju razvojem u Federaciji Bosne i Hercegovine.

(2) Implementacioni dokumenti usklađuju se sa nadležnostima Zeničko-dobojskog kantona i kantonalnih organa koji ih izrađuju, sa strateškim ciljevima i prioritetima iz Strategije razvoja Zeničko-dobojskog kantona („Službene novine Zeničko-dobojskog kantona“, broj: 3/21) i raspoloživim finansijskim sredstvima.

Član 3. (Zaduženja)

(1) Zadužuje se Vlada Zeničko-dobojskog kantona, da na prijedlog Ministarstva za rad, socijalnu politiku i izbjeglice Zeničko-dobojskog kantona, donese odluku o izradi Akcionog plana za implementaciju Strategije.

(2) Zadužuju se kantonalna ministarstva i kantonalni organi uprave da, u okviru svojih nadležnosti i u skladu sa implementacionim dokumentima, učestvuju u realizaciji aktivnosti koje proizlaze iz Strategije, u saradnji sa organizacijama civilnog društva, uključujući relevantna udruženja i organizacije osoba s invaliditetom sa područja Zeničko-dobojskog kantona.

(3) Zadužuju se organi iz stava (2) ovog člana da, u skladu sa članom 2. ove odluke, prilikom izrade implementacionih dokumenata, godišnjih i trogodišnjih planova rada, kao i programa utroška budžetskih sredstava, planiraju provođenje mjera i aktivnosti iz Strategije, kao i potrebna finansijska sredstva u okviru svojih budžetskih pozicija.

(4) Zadužuje se Ministarstvo za rad, socijalnu politiku i izbjeglice Zeničko-dobojskog kantona za koordinaciju aktivnosti iz stava (2) ovog člana.

Član 4.
(Stupanje na snagu)

Odluka stupa na snagu osmog dana od dana objavljivanja u “Službenim novinama Zeničko-dobojskog kantona”.

Broj: _____/26

Datum, ____ februar 2026. godine

Z e n i c a

PREDSJEDAVAJUĆI

Ćazim Huskić

O b r a z l o ž e n j e

I PRAVNI OSNOV

Pravni osnov za donošenje ove Odluke sadržan je u odredbama člana 37. stav 1. tačka f) Ustava Zeničko-dobojskog kantona, kojim je propisano da Skupština donosi zakone i ostale propise za izvršavanje kantonalnih nadležnosti i člana 18. tačka k) Ustava Zeničko-dobojskog kantona, kojim je Kantonu povjerena nadležnost za provođenje socijalne politike.

Pravni osnov za donošenje ove Odluke sadržan je i u članu 19. stav (6) Zakona o razvojnog planiranju i upravljanju razvojem u Federaciji Bosne i Hercegovine („Službene novine Federacije BiH“, broj: 32/17), da vlada kantona može predložiti skupštini kantona usvajanje sektorske strategije Federacije kao sektorskog strateškog okvira kantona.

II RAZLOZI ZA DONOŠENJE

U skladu sa članom 3. stav (1) tačka s) Zakona o razvojnog planiranju i upravljanju razvojem u Federaciji Bosne i Hercegovine (u daljem tekstu: Zakon), sektorska strategija razvoja je strateški dokument nadležnih institucija Federacije i kantona koji definiše javne politike, pravce, ciljeve i resurse razvoja sektora i proizlazi iz integrisane strategije razvoja. Članom 17. stav (1) Zakona propisano je da se sektorskim strategijama Federacije Bosne i Hercegovine (u daljem tekstu: Federacije BiH) utvrđuju ciljevi i prioriteti sektora, način njihovog ostvarivanja, finansijski i institucionalni okvir za implementaciju, monitoring, evaluaciju i izvještavanje.

Članom 19. stav (5) Zakona propisano je da sektorske strategije kantona donosi skupština kantona na prijedlog vlade kantona, dok stav (6) istog člana propisuje da vlada kantona može predložiti skupštini kantona usvajanje sektorske strategije Federacije kao sektorskog strateškog okvira kantona. Imajući u vidu da je Odlukom Parlamenta Federacije BiH („Službene novine Federacije BiH“, broj: 92/25), usvojena Strategija za unapređenje prava i položaja osoba s invaliditetom u Federaciji Bosne i Hercegovine 2025-2030. godine, Vlada Zeničko-dobojskog kantona predlaže Skupštini Zeničko-dobojskog kantona usvajanje Strategije za unapređenje položaja i prava osoba s invaliditetom 2025–2030 godine, koja će predstavljati sektorski strateški okvir Zeničko-dobojskog kantona, te okvir za izradu Lokalnog akcionog plana za period 2026.–2030. godine.

Usvajanjem Strategije za unapređenje prava i položaja osoba s invaliditetom u Federaciji Bosne i Hercegovine 2025–2030. godine kao sektorskog strateškog okvira Zeničko-dobojskog kantona obezbjeđuje se usklađenost razvojnih prioriteta Zeničko-dobojskog kantona sa federalnim strateškim dokumentom u ovom sektoru. Istovremeno se osigurava pravno utemeljen i koordinisan postupak, te neposredno provođenje mjera i aktivnosti usmjerenih ka ostvarivanju sektorskih strateških ciljeva sa nivoa Federacije BiH na kantonalnom nivou.

U skladu sa članom 19. stav (7) Zakona propisano je da, u slučaju usvajanja sektorske strategije Federacije kao strateškog okvira kantona, kantonalni organi uprave izrađuju implementacione dokumente u skladu sa članovima 23.–26. Zakona. Ovakav pristup omogućava

provođenje mjera i aktivnosti usmjerenih ka ostvarivanju ciljeva i prioriteta sektora na kantonalnom nivou, u okviru ustavnih nadležnosti kantona za provođenje socijalne politike kao i finansijskim kapacitetima. Na ovaj način osiguravaju se kontinuitet i usklađenost sa federalnim strateškim okvirom, kao i ubrzanje procesa implementacije strateškog dokumenta Federacije Bosne i Hercegovine na kantonalnom nivou.

Aktivnosti koje proizlaze iz Strategije provodit će se kroz koordinisanu saradnju nadležnih kantonalnih ministarstava i kantonalnih organa uprave, te u saradnji sa organizacijama civilnog društva, uključujući relevantna udruženja i organizacije osoba s invaliditetom sa područja Zeničko-dobojskog kantona, uz obavezu da se kroz izradu implementacionih dokumenata, godišnjih i trogodišnjih planova rada i programa utroška budžetskih sredstava planira provođenje mjera i aktivnosti Strategije, kao i potrebna finansijska sredstva u okviru raspoloživih budžetskih pozicija, čime će se osigurati puna participacija krajnjih korisnika i ostvarivanje strateških ciljeva.

III FINANSIJSKA SREDSTVA ZA PROVOĐENJE ODLUKE

Realizacija ove odluke, neće iziskivati izdvajanje dodatnih finansijskih sredstava u Budžetu Kantona za 2026. godinu. Na osnovu ove Strategije bit će donesen Lokalni akcioni plan za unapređenje prava i položaja osoba s invaliditetom za Zeničko-dobojski kanton, prilikom čijeg donošenja će biti izvršena procjena eventualnih troškova po Budžet Kantona.

Zenica, 26. februar 2026. godine